

受祝福 e 人生

經文：箴言 23:22-25

箴言、約伯記、傳道書 kap 一寡詩篇 (1, 119 篇等) 稱做智慧文學。約伯記 kap 傳道書是用獨白或對話 ê 形式思考重要問題。箴言 ê 體裁是用散文 kap 詩句爲主，包含實用智慧，內容涵蓋人生 ê 各方面，是智慧者將對生命 ê 觀察所得，用優美詼諧 ê 方式傳達 hō 世間人。我有一個朋友建議每工讀箴言，每工讀一篇總共 31 篇，án-ne 每個月 ê thang 讀一 pái。傳統認爲箴言 ê 作者是所羅門，因爲 1:24-25、王上 4:34 kap 第 10 章攏指出伊寫箴言 3000 句。箴言 ê 作者不只一人(1:1、22:17、25:1、30:1、31:1)因爲冊內有 7 ê 標題，清楚指出無仝 ê 作者。講到年代是 tī 主前九百多年到大約受掠回國之間寫 ê。Ûi 冊內以勸勉開始 kap 以主題性編 ê 形式來看，chit 種形式 ê 形成應該是 tī 主前五到四世紀。以色列除了祭司、先知以外 iáu 有智慧者，in 可能屬 tī 朝廷，專門收集當時國內外智慧箴言，目的是 beh 教示人過有智慧又正確 ê 生活。以色列人相信敬畏耶和華是知識 ê 開端 (1:7)，人 beh 過智慧 ê 生活，必須 tī 人際關係，家庭，言行，思想上應用上帝教示 ê 原則。箴言分兩大類：宗教類 (1-10 章) kap 生活類 (10-31 章)。箴言 ê 作者確信上帝是創造者 kap 統治者，人保留家己 ê 信念，人欲完成家己 ê 目標需要靠家己 ê 努力。智慧者要會曉閃避對家己不利 ê 事，譬如講：放蕩、pîn-tōaⁿ 等等。智慧 ê hō 人有豐盛幸福 ê 生活。有智慧 ê 必得報賞，愚昧者必遭遇 tiòh 懲罰。

每年 ê 六月第三主日是父親節，目的是 beh 喚起人孝敬老父，同時提醒作老父 ê 要注意 kap 負起 ê 責任。雖然一般人對父親節不如對母親節一般 ê 重視，但是上帝 tī 聖經中教示咱對父母 ê 愛是同款 ê，當老母辛苦照顧咱 ê 時，老父 mà 是努力地扮演上帝交託伊 ê 角色；咱 tī 慶祝父親節 ê 時，不妨反省一下，咱是 m̄ 是疼老父，因親像伊爲咱無私 ê 付出一樣？今 á 日 ê 經文真清楚 kā 咱講，孝敬父母是作人子女當盡 ê 義務，問題是應該怎樣作 neh？現今 ê 社會有真 chē ê 問題 lóng kap 家庭有關，溫暖 ê 家庭是社會和諧 ê 基礎，改善家庭關係 ē-tàng 有效解決社會問題。阮知影天下無完美 ê 父母，每個家庭 lóng 會有家己 ê 難題，屬 tī 家己 ê 親子衝突。這二、三十年來心理學界提出原生家庭 ê 理論真緊互學界接受，因爲原生家庭咱 ê 影響很深，不管你今年幾歲，你 lóng 會認同，父母影響咱如何看待家己 kap 家己 ê 能力，猶過 hō 咱影響咱 ê gín-á、夫妻 kap 人際關係。真 chē 人一生，攏 tiòh 找尋聖經中所講 ê 無條件 ê 接納。今 á 日 ê 經文就是教示咱，當咱有受祝福 ê 人生時，不要忘記將祝福延伸到父母，hō in ê 晚年充滿歡喜 kap 滿足。

台灣人有句話講信基督教死無人哭。這是對基督教真大 ê 誤解。十誠真清楚講：「當孝敬父母，hō 你 ê 日子 tī 耶和華你神所賜你 ê 地上會得 thang 久長。」(出 20:12) 保羅講：「要孝敬父母，你就事事亨通，tī 世上享長壽。這是第一條帶 tiòh 應允 ê 誠命。」(弗 6:1-3 上)。Tī 希伯來文「孝敬」有重要、有份量 ê 意思，所以孝敬父母就是強調父母 ê 價值 kap 重要性，肯定 in tī 咱生命中 ê 地位。換句話說，孝敬父母 ê 重要性，無是 tī-teh 你爲父母做什麼，是你 kap 父母 ê 關係如何？我知影，有 kóa 人 tī 破碎 ê 家庭長大，有 kóa 人 tī in 成長 ê 過程，可能受 tiòh 父母真 chē ê 傷害，可能父母 ê 某句話、某一寡行爲，tī 潛意識裏深深地影響 in。不過 Tùi 咱信耶穌開始，舊事已過，tī 基督裏是新造 ê 人，咱 beh 爲家己所做 ê tai-chi 負責。咱必須 hō 上帝改變咱 ê 生命，chiah ē-tàng 勝過生命中一切 ê 傷害。第 22 節講：beh 聽 tùi 生養你 ê 父親；你母親年老，要敬重伊。上帝設計 ê 家庭關係中，凡是 beh 表明咱 kap

上帝 ê 關係就用父母。beh 表明咱 kap 基督 ê 關係就用夫妻。可見 chit 兩 ê 關係上帝 lóng 真看重。所以聖經內面講 ê 孝敬父母，伊是正面 ê；不是 beh 父母來控制咱 ê 生活，也不是 beh 認同父母做 ê 壞事，卻是上帝 kā 父母 khng tī咱 ê 生命中，要 hō咱真 chē 恩典 kap 祝福，咱無必要為著破碎 ê 原生家庭來自暴自棄，要 kā 痛苦 kap 試煉當作寶貴 ê 功課，學習 tī 逆境中肯定自我價值，chiah ē-tàng 重新得到心靈上 ê 自由。

第 23 節講：「真理、智慧、學問、見識 lóng 值得你去買，千萬 bē-tàng 賣。」有時咱用錢買學問，譬如講：受教育、買書、買關鍵技術 (know-how) 等等。有時用錢買見識，譬如講：出外旅行、參觀博物館。古人講：讀萬卷書不如行萬里路，所以旅行 ē-tàng 增長咱 ê 見識。但是真理 kap 智慧卻是用錢買 bē-tiòh。beh 得 tiòh 上帝 ê 真理就愛付代價，真理 chiah ē-tàng 成做生命 ê 一部分。今年是德國殉道神學家潘霍華百年誕辰紀念日，伊 tī 追隨基督 ê 書講：廉價 ê 恩典是教會致命 ê 對敵，今 á 日咱得為珍貴 ê 恩典來戰。潘霍華強調恩典 m̄ 是白白地接受，是 ài 背起十字架，付出代價 ê chiah ê thang 領受。廉價 ê 恩典就是傳揚無悔改 ê 赦免，無教會管教 ê 洗禮，m̄ 免認罪 ê 聖餐。箴言教示咱要買真理，真理會帶來智慧。因為「敬畏上主是智慧 ê 開端；認識至聖者就是明智。」(9:10) 咱 ài 認清楚甚麼是真理，然後 ài 有順服到底 ê 智慧，bē-sái 因為家已作未到或是為 tiòh 自身 ê 利害得失，就 kā 真理 ê 標準降低。所以當咱初信 ê 時，歡喜領受真理；這並 m̄ 是講，真理就是咱 ê 啦。出代價買真理是有需要 ê，雖然真 chē 時 chūn 買真理 ê 代價是痛苦 ê。Jōa-chē 人 ê 失敗，就是 tī kap 家已利益衝突 ê 時放不下去，只好犧牲真理。咱 ài 如何 kā 上帝 ê 真理落實在生命裡面 neh? 作人父母 ê 若 ē-tàng 以聖經所教示 ê 真理來教育子女，活出榮神益人 ê 生活，án-ne 就是子女 tī 品格、道德 kap 屬靈上 siōng 好 ê 模範啦。

美國保守福音派 Dr. James Dobson 創立 Focus on the Family, 中文本為愛家雜誌，這是一本以家庭為中心 ê 基督教雜誌，ng 望美國成做愛真理 ê 國家。基督徒 lóng 意愛子兒有疼心，用真理作生活 ê 指南，疼人疼上帝，這是父母對子兒 ê 祝福。Bat 讀 tiòh 一篇小品講：生活 tī 批評中 ê gín-á 學會曉批評，生活 tī 敵視中 ê gín-á 學會曉鬥爭，生活 tī 驚惶中 ê gín-á 學會曉驚惶，生活 tī 妒忌中 ê gín-á 學會曉內疚，生活 tī 包容中 ê gín-á 學會曉忍耐，生活 tī 鼓勵中 ê gín-á 學會曉信心，生活 tī 稱頌中 ê gín-á 學會曉欣賞，生活 tī 誠實中 ê gín-á 學會曉明白真理，生活 tī 公平中 ê gín-á 學會曉公義，生活 tī 接納中 ê gín-á 學會曉愛，生活 tī 有安全感中 ê gín-á 有自信。所以一個基督化 ê 家庭，必然以真愛來維繫。Tī 我成長 ê 過程深深地感受 tiòh 父母祝福 ê 力量。Tī 我 gín-á iáu 小漢 ê 時陣，常常藉 tiòh 家庭禮拜 hō in 建立感恩 ê 心，大學以後，每擺節日團圓，mā lóng 藉 tiòh 家庭禮拜分享生活 ê 難題、接納 kap 肯定 in ê 價值，因為上帝對人 ê 肯定是在 tī 人本身 ê 價值，m̄ 是伊 ê 表現，有一日，in ê 恩賜 kap 特質會受 tiòh 上帝 ê 祝福 kap 重用，最後阮會同心牽手祈禱，為 gín-á 祝福。Án-ne, 雖然 gín-á 大漢離開厝，阮 ê 心猶原相結連。ng 望咱作父母 ê tùi 今 á 日起 hō gín-á 祝福，千萬 Bē-tàng 用無時間作藉口。若兄姊有心，但是 m̄ 知 tùi 何開始 ê 歡迎來 chhōe 我。

耶穌對人類 ê 愛，hō咱用愛去建立家庭，彼此祝福。Tī 父親節 ê 時陣 hō咱作子兒 ê koh — pái 思考如何重建 kap 父母 ê 關係。尤其是住仔美國 ê 咱，雖然 bē-thang 常常轉去看 In，也 tiòh 常常 tī 心內掛念著父母，時時拍電話請安，為 in 祈禱。ng 望兄姊 ē-tàng 明白上帝是祝福 ê 源頭，m̄-nā 得 kap 上帝親近，也 ē-tàng kap 所疼 ê 人開展新 ê 關係。